

TORITENY - ALAHADY PAKA - TAONA D



Nitsanga-ko velona aho ka tafaraka aminao indray

Ry Kristianina havana, ankafaliana ankaravoana tokoa no anolorana ny fiarahabana, ny firariantsoa amin'izao Paka izao, raha misy ny fankalazana ho antsika Kristianina dia ny Paka no farantampony satria ao no fototry ny fiainantsika sy ny finoantsika dia i Kristy tafatsanga-ko velona ka faly manolotra ny fiarahabana sy firariantsoa ho antsika rehetra tsy ankanavaka na mpivavaka na tsy mpivavaka, na kristianina na tsy kristianina fa fototry ny fiainana maha-olombelona no ankalazaintsika amin'izao Paka izao, nandresy ny fahafatesana i Kristy. Fantantsika fa io fahafatesana io no olana farantampony amintsika, misy la clé sy vaha-olana izy ankehitriny satria nandresy ny fahafatesana ny zanak'Andriamanitra. Fantatr'Andriamanitra fa izany tokoa no tena olana amintsika olombelona ary mitady vaha-olana mikasika ny fahafatesana io isika olombelona. Iray ihany ny "solution" dia i Kristy tafatsanga-ko velona.

Vakiteny I : Asa 10, 34a. 37-43

Tononkira : Sal. 117

Vakiteny II : Kôl. 3, 1-4

Evanjely : Lk. 24, 13-35

Izay no mahatonga atsika ry Kristianina havana, atsika oloaraiky jibaby mifanolotra firariantsoa sy fiarahabana amin'izao Paka izao. Ary Paka manokana ity paka 2016 ity satria ao anatin'ny taona masina famindrampo, izany hoe i Kristy tafatsanga-ko velona no endrik'Andriamanitra manolotra ny famindrampony amintsika ka ny fon'Andriamanitra

raha mandray azy tafatsangana isika no FO ao amintsika ka hiova ny fiainantsika. Ny vokany dia ho hisy fiadanana tokoa eo amintsika, ho lavitra ny hery setra, ho lavitra ny fitapitaka fa ny fahamarinana no hanjaka, ho lavitra ny ady fa ny fihavanana no mijoro. Izay no ankalazaintsika

amin'izao Paka izao, rarintsika mba ho Paka fiadanana, fihavanana, hampanjaka ny rariny sy ny hitsiny tokoa anie izao Paka izao ka mifanolotra firariantsoa isika. Izany no tonom-bavaka ataontsika amin'izao Paka izao mba haninteraka ny fiainantsika tokoa i Kristy tafatsanga-ko velona ary ny tenin'Andriamanitra izay haroso amintsika ary ho banjinintsika amin'izao Paka izao dia mampianatra atsika tokoa amin'izany ary mandrosoka atsika hiaina an'izany. Nofidina ireo vakiteny ireo, maro ny azo hisafidianana amin'izao Paka izao, araka ny taona sy ny loha-hevitra tiana ambara, ny vakiteny voalohany tsy miova, fa ny vakiteny faharoa kosa no safidianana ho alalinintsika amin'izao androany izao dia ny taratazin'i Md Paoly ho an'ny Kolosianina ary ny Evanjely dia mitantara izay niseho tamin'ny mpianatra tany Emaosy, i Jesoa nitsanga-ko velona niseho tamin'izy ireo. Vakiteny hita fa hanampy atsika amin'izao Paka izao ireo hivelomana an'izany fety lehibe fototry ny fiainantsika sy ny finoantsika dia i Kristy tafatsanga-ko velona. Io no mahatonga an'i Md Paoly nilaza hoe : "Raha tsy nitsanga-ko velona i Kristy dia foana ny finoana". Marina izany satria io no fototry ny finoantsika ary izay no mahatonga atsika ho ravo sy ho faly amin'izao Paka sady anatin'ny taona masina ny famindrampo izao.

Raha misy ny firariantsoa dia mba ho Paka fiadanana, fihavanana, hampanjaka ny rariny sy ny hitsiny tokoa anie izao Paka izao ka hiadam-pinaritra ny tanànantsika, ny tanindrazantsika ary ny fianakaviana tsirairay avy, araka ny hafatry ny Papa izay nivoaka tamin'ny Asabotsy lasa teo fankalazana an'i Masindahy Josefa, mbola ho hisy moa ny fotoana hamakafakantsika an'izay taratasy famporisihana vokatry ny sinaody anankiroa mikasika ny fianakaviana ka hahatonga tokoa ny fianakaviana ho Eglizy kely, loharano sy fototra an'izay Kristy tafatsanga-ko velona izay ka hitondra fiadanana.

Izay tokoa no ambaran'ny vakiteny voalohany amintsika, tsy hoe angano sanatria na resabe fotsiny i Kristy tafatsanga-ko velona fa olona velona, tsy matoatoa na angatra i Jesoa fa tena velona tokoa izy miara-miaina amintsika. Voalaza ao amin'ny Asan'ny Apostoly : "Niara-nihinana sy niara-nisotro taminy izahay, niara-niaina taminy izahay talohan'ny niakarany tany an-danitra". Vavolombelona izany ireo Apostoly ary io no azahoantsika ny làlam-pamonjena ho antsika, izay no mampiova ny fiainantsika satria tsy resabe na fampianarana an-kandrina fotsiny na resaka atao hampanonofy fotsiny na fampianarana hevitra fotsiny ny finoana fa mifototra amin'ny olona nandresy ny fahafatesana faratampony amin'ny olona misy amintsika olombelona. Efa nolazaina teo ary fa fantatr'Andriamanitra izay ka nomeny atsika ny la clé dia i Kristy tafatsanga-ko velona.

Raha mandray an'i Kristy isika, raha miara-maty amin'i Kristy amin'ny fahotana isika, izany hoe ny fisarahana amin'Andriamanitra, izay ny fahotan'i Adama sy Eva, dia tonga eo anivontsika i Kristy ary izay no ambarany vakiteny voalohany.

Mitoera ao amin'i Kristy

Izay koa no miseho ao amin'ny Evanjely tena kivy dia kivy ireo mpianatra niala tao Jerosalema hankany Emaosy, inona ny dikan'izay ? Jerosalema dia tanàn'ny fiadanana, hazahoana ny fahasoavana rehetra, tanàna masina, ary dia nanantena an'izany ireo mpianatra satria nahita ny zavatra nampianariny sy nataon'i Jesoa ka nametraka fitokiana taminy kanefa maty izy. Hitan'izy ireo i Jesoa nafantsika teo amin'ny hazo fijaliana, hitan'izy ireo izy maty dia nalevina ka dia lasa izy ireo satria lavo ilay nantenaina. Niala tao Jerosalema izy ireo, hody any Emaosy hamonjy ny fiainana andavanandro.

Ary fantara fa fiainana andavanandro tsy zarizary satria tsy ho hita intsony ilay nantenaina. Nefa tena an-dàlana izy ireo no niaraka taminy i JESOA; Izay koa ry Kristianina havana , miaraka amintsika lalandava i Jesoa amin'ny fiainantsika, tsy misaraka amintsika izy fa matetika noho ny fahotana, izany hoe noho ny ataontsika ihany ; ny hery setra, ny avonavona, ny fialonana, ny fitiavan-tena izay mandrakotra ny masontsika, ny fontsika, ny sofintsika, ny tànantsika ka mila fibebahana izany. Izao taona masina famindrampo izao, rehefa mibebaka isika dia zary mason'Andriamanitra no hijerentsika ny zavatra rehetra. Inona tokoa moa fa rehefa nandray an'i Jesoa ireo mpianatra roalahy na dia hitantsika fa mbola anavona mihitsy, enontsika ny tenin'i Kleofasy niteny tamin'i Jesoa hoe ; “Ianao angaha vahiny ?” Izay koa no matetika ataontsika, tsy vonona handray ny hafatr'Andriamanitra isika fa mihevi-tena ho mahalala ny zavatra rehetra. Isika koa aza mitady hampianatra an'i Jesoa, dia nolazainy ary ; Inona moa izany no niseho ? Fantantsika fa i Jesoa dia olona tsotra tsy mba manakorontana atsika izy. Henontsika tsara ny tantarany tamin'ilay vehivavy nangatahiny rano teo ampototry ny vovo, nangataka rano am-pahatsorana i Jesoa ary dia eto ihany koa izy izay mahafantatra ny zavadrehetra dia manontany am-pahatsorana ; inona moa izany ? Nanao azy hampianatra ary nararaotiny koa hamoahany izay ao ampony ny namalian'ireo mpianatra an'i Jesoa. Hitan'i Jesoa fa marina izy ireo ka nampianatra azy ireo izy nilaza hoe ; “Ry adala sy votsa saina”, io tokoa ny toetrantsika. Matetika atsika tsy ny tena fampianarana no raisintsika fa ny fampianarana avy any ivelany. Rehefa nivaofy sy nampianatra azy ireo ny soratra masina i Jesoa, dia tonga saina ireo mpianatra. Hitantsika ry Kristianina havana fa Fototry ny fiainantsika tokoa ny baiboly. Izay no mahatonga ahy matetika mamporisika atsika hamaky ny baiboly fa indrindra amin'izao taona masina izao. Ny soratra masina tenin'Andriamanitra dia làlana sy fahamarinana ary fiainana hanilo ny fiainantsika. Nisokatra ny FO, ny maso, ny sofina, ny tànàn'izy ireo noho ny famindampon'Andriamanitra ka ny mason'Andriamanitra no nahitan'izy ireo an'i Jesoa, teo izy ireo vao gaga ka nangataka sy nitalaho tamin'i Jesoa ny hitoerany fa efa haiva ny andro. Izay koa no ataontsika amin'izao Paka izao ry Kristianina havana, handeha hitalaho amin'i Jesoa isika “Mitoera re ety aminay fa efa hariva izao ny andro”. Hariva manambara fa maizina ny fiainantsika. Io ny fiainantsika eto an-tànana na amin'ny fianakaviana, na amin'ny fiaraha-monina, na eto amin'ny tanindrazantsika. Hariva ny fiainantsika ka mila an'i Jesoa, mila FO araka ny voalazako tery amin'ny pelerinajy montagne de français, mila fahazavan'i Kristy, izy tafatsanga-ko velona hanilo ny fiainantsika. Alina ny fiainantsika ka hitalaho amin'i Jesoa atsika amin'izao taona masina izao “Mitoera re ry Jesoa

aty aminay”, lo no antony hanaovantsika ny la chapelle famindrampo mba hitoeran’i Jesoa eto amintsika. Ho eto anivontsika tokoa anie i Jesoa ary dia hanilo ny fiainantsika. Ndao isika mianakavy hanao ezaka hanatanteraka an’io chapelle io. Rehefa nijanona i Jesoa nizara ny mofo tamin’izy ireo dia nirehidrehitra ny FO amam-panahin’izy ireo, nirehidrehitra nairanihinana tamin’i Jesoa ary izay ny Eokaristia. Fankalazantsika ny paka ny Eokaristia na ny ankalazaintsika andavanandro na ny isaky ny Alahady fa indrindra amin’ny Alahady ho avy dia mankalaza an’i Kristy tafatsanga-ko velona nandresy ny fahafatesana, nandresy ny ratsy eo amintsika ka na inona ny zava-mitranga, na inona aza ny olana dia afaka miroso isika. Ny vakiteny faharoa nosoratan’I Md paoly ho an’ny Kolosianina no mampianatra atsika ; “Raha miara-maty amin’ i Kristy ny fahotantsika dia hiara-belona, hiara-mitsangana aminy koa, ny zavatra ambony amin’izay hitoeran’i Kristy no katsaho”.

Aoka tsy hirefarefa intsony ny fiainantsika f’efa miara-mitsangana, mijoro isika satria ny ambany dia mirefarefa, izay ny asan’ny demony, izay ny asan’ny bibilava izay nitsakitsahin’i Masina Maria. Raha miara-mitsangana amin’i Kristy isika dia handresy. Ny zavatra ao ambony no katsaho dia ny fifankatiavana, ny rariny sy ny hitsiny, ny fihavanana, ny fijoroana ao anatin’ny marina, izay no tian’i Jesoa, fa ireo risoriso, fitapitaka, vonoan’olona, halatra isankarazany dia asan’ny maizina. Efa ao anatin’ny fahazavan’i Kristy isika ka izay misy an’i Kristy no katsaho. Ireo no làlana hizerantsika.

Ry Jesoa Kristy zokinay ô, nandresy ny fahafatesana tokoa ianao, nandresy ny ratsy rehetra ianao ka raha miaraka aminao izahay, izay misy anao tokoa, izay hitoeranao anie misy anay dia ho feno hafaliana izahay sy afaka handresy ireo zavatra manahirana rehetra, hikatsaka mandrakariva ny marina, ny tena fifankatiavana, hiady amin’ireo fitiavan-tena, ireo fialonana, avonavona izay mahatonga anay hirefarefa amin’ny tany. Ny masonao tokoa anie no maso hijerenay ny zava-drehetra ka hiova ny fifandraisanay amin’Andriamanitra sy ny fifandraisanay samy olombelona na koa amin’ny zava-boahary ka hitoetra ao anatin’ny fifanajana. Hiova tokoa ny tanaanay, mba tsy ho tånana hanao ny hery setra na ny fitapitaka na vonoan’olona fa tånana hifandray ao anaty fihavanana. Enga anie hovanao koa ny sofinay mba ho sofina hahay hihaino ny hafatrao ka hitahiray sy hivelona an’izany eo anivon’ny fiananay andavanandro ary indrindra ovao ny vavanay mba ho vava hanambara ny hafalian’ny vaovao mahafaly eo anivon’ny fianakaviana, ny fiaraha-monina, sy eo anivon’ity tanànanay sy ny tanindrazanay ity, hanjaka tokoa anie ny fiadanana ka ho Paka feno fiadanana sy feno famindrampo izao Paka 2016 izao. Amen

Mompera Arseveka Mgr Benjamin Ramarason